

Jaorverslag VVDS 2012-2013

2012-2013 was ut jaor van:

- Prins Jop d'n Urste, mit zien prinses Rianne,
- van Jeugdprinses Renske d'n Urste, Jeugdvorst Jesper en Jeugdnar Jannes
- Ut jaor van de sosjal meedia; Twitter, Feesboek en Haifs, . . . en toch ok wer nie.
- Ut jaor van de duo's; . . . van Steve en Bill . . . en van dr. Oetker en Herman den Blijker
- Ut jaor van kamilie-tië . . . vur de prins um bej stem te blieve
- en ut jaor van positief blieve, dur ow eige geluk te make
- en natuurluk wer ut jaor van enne fantastisch mojje vastelaovend ien Oeldere.

Ut bestuur bestoond uut:

- Vurzitter Hans Loonen
- Vorst Emiel Evers
- Penningmèster Robert Steeghs
- Sik Rob Kunkeler (den al en klén bietje plat kan schrieve)
- En de bestuursleje . . . Freek Smulders - Martijn Drabbels - Jos Willems

De Raod van Elluf bestoond dit jaor uut:

Erwin Steeghs - Stef Claessens - Tom Loonen - Pascal Classens - Freek Smulders - Vincent Verstappen - Bart Jenneskens - John Voermans - Fred Peeters - Roel Steeghs en Marc Steeghs.

De Vurafjes

Normaal beginne wej osse terugblik altied op 11- 11, mar dit jaor han wej al ut ien en ander mitgemakt, . . . zowel ien positieve as ien negatieve zin.

Zoë ware wej mar liefst twië kier op en bruluft uutgenudigd;

- bej Pascal en Lizzy
- en . . . bej prins Flins en zien prinses Maria

Zowel prins Flins as Pascal hielde de brulluft ien os eige Oeldere.

Prins Flins hield de brulluft an huus op de Gunhoek . . . en Pascal hield um bej zien eige elders an huus. Ut waare twië prachtige fiëste wor ut os an niks ontbroke het.

Ok make wej iën van de zwartste bladzijdes uut de geschiedenis van os veriëning mit; mit pinksteren kwame os raadslid Willem Arts en zien vriendin Joanneke Schuiffel, dur en bizar ongeluk, um ut leve.

Ien pak . . . mar zonder steek en versiersele . . . hebbe wej zowel de aovendwake as de uitvaart bejgewoond. Vorst Emiel hed tevens de avondwake moj gesproke, en wej hebbe toen nog iëne kier hiel hard geklapt vur Willem en Joanneke.

Ut gut ollie goed, . . . wej zulle ollie noëts vergete.

D'n 11-11

Ut seizoen begoos tradisiegetrouw wer op d'n 11^e van d'n 11^e.

Umdat dat dit jaor op enne zondag viel zien wej op tied begonne; namelijk s'middags um drie ovver halluf vief, oftewel um 16.33 uur.

Um ut dan toch tot s'aoeves laat vol te kunne halde, haaj ut management van d'n Terp vur en spesjaal 11-11 menuutje gezurrugd. Vur mar 4 euri kregde Soep, Friet en enne Sneek.

Dor wier dan ok, dur veul minse, dankbaar gebruik van gemakt.

De Mök wier iengezegend dur ozze prins Flins den dur duudelik nog efkes ien moos komme noa de zommerstop; . . . hej was namelijk ziene liefspreuk vergéte. Gelukkig koos prinses Maria um daar en bietje bej hellepe.

Verder was ut enne vruchtbare dag, want we han mar liefst drie neje raodsleje te presentiere. Ut ware drie jong klutjes, wor wej nog nie veul van wisse. Mar gelukkig han de moeders (of waare ut toch de vaders) enne brief naar vorst Emiel geschreve mit wat info over de mennekes; . . . os mennekes.

- zoë voetbalt Fredjezuuktendansmarietje@hotmail.com ien ut Vieft . . . en wet hej ze ien de kantine **WEL** te rake
- Roeliezuuktendansmarietje@hotmail.com is en groët fan van Ola Toivonen, voetbalt zelluf ien ut Urst en mugt . . . as hej gescoord het, op blieve tot nao boer zuukt vrouw.
- Zien bruur Marc gefit niks um voetbal; hej sleutelt ger an zien brummerke . . . en mot durrum dus meestal fietse.

De mennekes lage dissen aovend veuls te laat ien bed, want ut was nog lang gezellig ien d'n Terp. Os excusses an de moeders van os mennekes.

Ut Vorstenraodsbal

De zaoterdag dur nao, 18 november, was ut groët fiest ien Ysselsteyn.

Dur wier en spesjaal Vorsteraodsbal georganiseerd omdat de vorstenraad 4x11 jaor bestond.

Wej ginge dur s'middag al nor toe mit de bus, . . . die wej helaas mosse dele mit de Knuppels uut Casele.

Nao en schôn middagprogramma, wor onder andere ut jubileumboek wier gepresentierd, schove wej mit zo'n 450 man an vur en heerluk buffet. Daornao begos ut aovendprogramma en dorvur ware dur nog is zo'n 60 Mökke nor Ysselsteyn toe gekomme.

Die hebbe allemol enne hiël schônne aovend mitgemakt, mit diverse optrejes uut de verschillende durrepe. Ut absoluut hoëgtepunt was toch wel ut optreje van os eige Oelderse toppers, die dor definitief zien durgebroke.

Op ut end geenge wej allemol same mit de bus wer nor huus, al zingend mit en hoëg "**oh-oh-oh-oh** . . . **waar ziede gej dur enne van**" gehalte.

De Caselse Knuppels hebbe wej op de terugweg gelukkig kunne afschudde.

Dus ondanks enne aovend zoepe, . . . was ut gemiddelde IQ ien de bus . . . mit d'n terugweg toch en stuk hogger dan d'n hinweg.

Op 23 en 24 november ware de Bonte Aovende

Ut was wer 2 aovende gezellig druk, en wej hân en vol programma. Emiel begos mit ut vurstelle van os 3 neje raodsleje, zoedat de minse die dur 11-11 nie bej ware, ok kosse zien wie die drie neje klutjes ware.

Daorna wier dur dur vorst Emiel op indrukwekkende wieze nog enne kier stilgestaon bej ut overlijden van roadslid Willem en zien vriendin Joanneke. Hier koste duudelik zien dat wej dur as veriëning ôk vur mekaar zien op de minder leuke momente.

Hiernao zaat Emiel efkes ien enne dip en hej zocht dus hullup ien de zaal.

Gelukkig was Han van de Sande toevallig an ut obere en hej besloot um Emiel te hellupe.

Snert was ut hier nie mit ens, want hej was bang dat enne ober minder zuuj betekene dat hej te wendig te drinke zuuj kriege. Zellefs de 2^e aovend haaj Snert nie ien de gaate dat Han ien van de artieste was. Han wier de rechterhand van Emiel en veulde zich as enne vis ien ut

WAT-TER.

Ut urste optreje van dun aovend was van de showdrums die dur enne echte biesteboel van makten. Zej bewoge ritmisch op de geluide van verschillende biëste en han dizze kier gen trommels nudig.

Zeej wiere opgevolgd dur Bolltje Pretvet den nor ut ziekehuus mos vur en stirrelisasie. De moraal van zien verhaal was dat ge errug mot oplette as ge j en gebruukt schermachien kopt, want ge wet noets wat de vurge gebruiker dur mit gedaon het.

Toen kwaam de Piëldansers uut Ysselsteyn ut toniël op, die unne schonne dans han. Ut was en vieftal die dun urste aovend mit zien viere ware en twedde aovend mit zien drië. Mar goed dat wej mar twië bonte aovende han, anders was dur warschienluk niks van dit groepke over gebleve.

Roel en Fred zien overigens nog steeds op zuuk nor de twië missende dansmarrietjes.

Dornao wier ut podium umgetoverd ien en hierewc. Mit dees akt lierde wej de nej raodsleje toch anders kenne as uut de brieve van hun moeders. Natuurlik wiere zej ondersteund dur hun kameruuj. Mark, Joep, Niek, Thijs, Giel, Roel, Danny, Mike, Fred en Martien, moj gedaon.

Toen kwam dur en stuk film gemakt dur Dennis Claessens. Wej zage hier dat Frank Pluum ut huus van vrouwke Willems verekkes moj het opgeknapd dur dur en groët zwembad ien te make. Ok zage wej dat het huus van Richard Geurts bej de verkes af was.

Dornao praote Wiel Helm os bej over de Nico de Melo fietstocht die hej gemakt haj. Frank moj gedaon jong. Eindelijk wèr enne schônne Oelderse buut.

Nao de pauze en de brudjes kwaam dur enne groëte zatlap op de buun. Hej vertelde twië aovende en gans ander verhaal, mar wis beide kiere de zaal onder de taofel van ut lache te kriegen. Zoë kwaam hej mit en blauw oëg terug van de supermerrit, alliën umdat hej tigde en dikke vrouw de slogun van de supermerrit gebruikte . . . "Hallow Jumbo!"

Toen kwame Geer en Goor, die nie ien ut plat, mar mit en Amsterdams accent de Oelderse roddels besproke. Ok zeej wisse dat ge bej en bezuuk an en autograas meestal genejd werd, mar bej Gerrit Voermans was dat wel hiel errug . . . lullig.

Dun aovend wier afgeslote dur Spuit Elluf die en antal schôn liedjes han, mit de nudige kwats dur tusse dur. Zeej kwame van Hellemond, dus ik was dan ok blej dat nao de vurstelling miene fiets dur nog stond.

Tejens de 2^e aovend kregje alle artieste en roowj polbandje uutgereikt dur prins Flins, mit de tekst . . . "**gej wet wat desmaak van Carnaval is**". Dees bandjes kunne now al as collectors items gezien werre. . . Naodat osse vorst alle artieste nog enne kier ut podium op geroepe haaj, as afsluuting van de aovende, bleef ut op beide aovende nog lang gezellig.

Mit Flins naor Mersele

Dun dag nao d'n Bonte Aovend was dur wennig tied um bej te komme, want we mosse namelijk nor Meeeeerseeeee, dat zien 5x11 jaorig bestaon vierde.

Wej ware dor mit en schon delegasie anwezig. Umdat Emiel familieverplichtinge haaj, moog Prins Flins uut woordje doen en un cadeautje anbieje. Umdat de Zagewetters um enne envelop vroege, hed Eric dan ôk ennn dikke envelop afgegove, wor ze verrekke blej mit ware.

Ut was vur hun alliën jommer dat dur alliën mar snoep ien zaat. Umdat Flins nog nie van al zien polsbandjes af was, het hej dur in Mersele ôk nog en paar uitgedeeld. Dat moje roowje polsbandje kunde teminste mit trots drage, . . . die gele van "**Lens - mit de sterke erm**" hebbe we allemol al lang weggeschote.

Ut Prins raoje

Op zondag 30 december kwame wej . . . same mit os kammeraoj . . . bej owlie an de deur vur ut prins raoje. Op veul platse kwam Jop ziene naam toen al vur de raam te hange. Mar dur wiere natuurluk veul mier name genoemd, dus ge kost dur nog niks van zegge. Dur wier ien ieder geval massaal mitgedaon dur iederien, en dat is toch altied wer moj um te zien.

6 Jannewarie, de Prinse Proclamasie

Um halluf twië was ut al goed druk ien dun Terrup, want iederiën woj ut aftreje van prins Flins en zien prinses Maria natuurluk nie misse. Flins haj nog en moj latste praotje, mâr hej haj ôk nog wille zinge. Dat koos helaas nie dur gaon umdat Gerrit de CD kwiet haj gemakt. . . mar dat was natuurluk allemol flauwekul . . . wat iederiën dur haj . . . iederiën . . . behalve vorst Emiel; . . . en den was dan ôk pissig op Gerrit.

Dornao wier dur en moj stukske opgevoerd dur de latste 3 Prinse, alliën jammer dat ald prins Martien te laat was. Ôk dat was natuurluk wer flauwekul . . . en ôk dat haj iederiën natuurluk wer dur . . . iederiën . . . behalve vorst Emiel.

Martien trok ozze ex-prins en schôn APK-tenuuke an; op ut toffellake was d'n assenbak zellufs blieve plekke en ziene scepter wier umgeruild vur enne pleeborstel. Uuteindeluk hebbe ze toch beslote um ex prins Flins en fatsoenluk APK-tenu an te trekke, mit en kej moj zwart strikske, . . . dat ik wel wat an de klène kant viend. . . Misschien mot de APK is gaon vergadere over en grutter strik.

Ut was en moj gezicht dat zo'n gigantische afvaardiging van de APK ut complete gebied rondum ut biljart haj overgenome van de raod. Volges veule was dit prinsaftreje en vurbeeld van hoe ut de kommende jaore mot zien.

Darnao ginge wej mit zien alle nor de Liende onder anvoering van de Mök is los; we zate immers zonder Prins, . . . dus dur mos toch wer enne neje komme. Gans Oeldere was nejs gierig, dus toen de schuufwand um 11 ovver 3 ope ging was uut dan ôk flink druk.

De computerexpers van buro Steve & Bill zate dor mit enne gigantische computer en zej han gewed dat zej mit ut analiziere van de sowsjal media de neje Prins kosse vurspelle.

De oplettende kieker haj natuurluk al lang gezien dat dit Steve "Apple" Jobs en Bill "Microsoft" Gates ware.

De hieere ware druk mit ut analiziere van Feesboek, Twitter en Hajfs, en mieke ondertusse veul flauwe grappe, wor zej vural zelluf, um mosse lache, **gna-gna-gna**.

Op en gegeve moment kwame zej toch wat op ut spoor, en dur bleve steeds minder kandidate over; mar net toen ze um bejna geraoje han begoof hunne kompjoeter ut.

Dus toen mos vorst Emiel toch zelluf an dun bak. De spanning was dan ok te sneje toen hej de elluf regels op laas . . . én toen ware ze daar . . . **Prins Jop dun Urste en prinses Rianne**. Nao alle gedoe over de sowsjal media was ut moj dat uitgerekend zonne jonge prins ien zienne speech metiën korte mette makte mit den kompjoeter kwats.

Hej vertelde dat hej ut echte persoonlijke kontakt veul belangrieker vond . . . en dat zeker mit de carnaval.

Hej eindigde zienen speech mit ziene liefspreuk, geïnspiriend dur ut "ongeluksjaor" 2013, "**Enne echte mok, makt zien eige geluk**". Moj kort mar ZEER krachtig.

Nao enne groëte polenaise ginge we snel verder mit ut uitkomme van ut jeugdtrio.

Nao wat hullup van de kompjoeter en van de kiender, die allemol goed mit dun, koos vorst Emiel ut jeugdtrio bekend make. **Jeugdprinses Renske, Jeugdvorst Jesper en Jeugdnar Jannes**. Toen ze allemol gespeechd han, kreghe wej ien de gate dat wej aardig wat speechgeweld ien huus han. Renske haj urre eige speech motte make, want anders haj zeej vur ure Pap ut eierhok schon motte spuite of vur ur mam d'n ganse hushald motte doen. Zeej haj vur veul gekokte eier gezurrugd en kos dus al nie mer kapot bej de groëte raad, . . . behalve dan bej diegene die daags daornao mosse op ruume.

Jeugvorst Jesper makte zichzelf metien wereldberoemd in Oeldere en umstreeke mit zienne legendarische speech; **Dat bin ik**.

Naodat ôk Jannes moj haaj gespeeched koos de ganse jeugdraod (25 man sterk) op de nek.

Dornao kwaam DJ Maarten pletjes dreje, en hej het dur same mit alle Mökke nog enne schonne middag van gemakt. Tigge d'n aovend bezochte wej de soos wor de jeugdraod goed bezig was en ut trio nog enne kier moog speeche.

Dur was iën lid van de groëte raad den grappig docht te zien dur tejens speeche hin wat te kunne roepe, . . . mar daor kreeg hej al hiel snel spiet van, umdat hej vakkundig op zien nummer wier gezet dur de neje jeugdvorst.

Dornao geenge wej eiere ete bej de prins. Ze zen dat den nie zo'n groët huus haj, mar dor war echt hiël veul plats: ien de kamer, ien de keuke, ien de studierkamer, ien de wc, dun doche, ien de gang, onder de trap, en gelukkig was ut moj wér en koose ze ôk nog op ut dakterras zitte. We ware alliën vergete dat Jop gen koffiezetaapparaat haaj, mar gelukkig haj Paula en stuk of tien thermoskanne mitgegeve. Dornao geenge wej wer nor den Terrup wor ut s'aoves nog druk en hiël gezellig was. Toen we 's nachts buute kwame, was ut nog verrekes werrum buute, mar dat kwaam warschienluk umdat dur bej prins Jop nog enne raam ope stond.

Ut Ald Wieverbal:

Zaoterdag 19 jannewarie was ut dan zo ver. Ut fiëst der fiësten oftewel ut Aldewieverbal. Vanaf halluf nege was dur en Heppie Uurke en dor ware veul minse op af gekomme. Ut was dan ôk al vroeg druk en ut zuuj nog veul drukker werre. Um halluf tien ware dur veul schôn verklejde minse binne en kosse de prieze verdeld werre.

Bej de groëte groepe won fieftig tinte gries, bej de klene groepe de lak-eien. Bej de trio's won prinses Rianne, same mit twië vriendinne, en bej de duos wonne Guus en Judith Willems. Alliën jammer dat bej de iënlinge enne volslage vremde won; ik . . . wiët ok nie wie dat was. Latter bleek dat ut um familie geeng van de prins van Aostrum.

Mit de band Sjoeltingstied ginge we hielemol uut os dak en wier ut en kej moj fiëst.

Dur ware wer sneks, dur ware wer koje en brei, dur ware wer veul medailles kwiet en prins Jop trejde nog iënne kier op as Topper.

Latter op dun aovend kwame de Ostrumse Karklingels binne en die vonde ut natuurluk kei leuk um ok is enne kier op en echt gezellig fiëst te zien. Wej hebbe dur verder nie veul an gehad, mar ut is altied mitgenome ien dun drankumzet. Alliën vonde die Klingels ut zo verrekte gezellig, dat zej gér en soevenier mit nor Aostrum won neme. Dus mos os iengangsspandoek van de Liende dur an geleuve.

Zej nome dit mit dur veur en achter dé raam van den auto ope te zette, um vervolges mit -10 graoden, en ieskalde klauwe, naor huus te reje. Die Klingels hebbe mier over dat doek ien spanning gezete dan wej, want dat doek is ien Ostrum wer gejat dur en paar Piëlhaze.

Die ware wat slimmer dan die Aostrumse Klungels en hebbe ut doek gewoën uut ut alleminium freem gehaald en ien de binnetes mitgenome nor Venroj.

Wej hebbe veul ervaring mit dit sort ontvoeringe, angezien wej buure zien van de Knuppels.

Ut mojest is altied um net te doen of ge niks gemerkt het; dan gaon zej ow vanzelluf belle. Die Klingels hebbe efkes veul schik gehad en dornao veul zurrug, zeker toen de Piëlhaze in enne dreigbrief de Klingels utmakten vur Klungels. Uuteindeluk is ut allemol goed gekomme en is ut doek de zaoterdag vur de resepsie wer teruggebrogt.

Prinses Rianne vond ut zonne schonne aovend dat zej spontaan ging "stage-dive", mar zej duuj dat zo entoesjast dat ze bijna over de kels hinsprong, die ur op won vange; ut ging nog mar net goed. Helaas hebbe wej hier gen foto van.

Nao afloep zien wej gezellig eikes wiste ete bej Jos, . . . den ien zien latste jaor, de raod nog wel iëne kier over de floer woj hebbe.

Onderweg nor Jos toe leek ut wel of we over de Noordpool fietste zo kald was ut. Sommige han gelukkig enne kortere weg ontdekt over ut land, . . . die kwame net dor toen de rest nor huus ging, . . . zo kort was dat. Al mit al enne kej gezellige aovend, én mit recht ut fiëst der fiësten.

Circus Mök

De vreedag dornao, de 25^e jannewarie, ginge we nor Circus Mök. Dat was dizze kier en hiël geslaagde uitvoering. Nao afloëp was ut ien de fwajee errug gezellig, al kwame wej dor alwer de Karklingels tege.

Ok kwame wej dor Tom & Suzan en Twan & Albertien van de Leng tege. Die zate al de hiële aovend ien de fwajee te zoepe, . . . want zeej han kartjes bej zich vur d'n urste vreedag van Circus Mök, en dit was dun twedde.

De Krantverkoëp

Daags nao Circus Mök, . . . zaoterdag 26^e jannewarie, . . . stonde wej um 11 uur startklaor vur de krantverkoëp. Hiervur werre wej elk jaor ondersteund dur de Kammeraoj.

Sinds vurrig jaor wert de krant vort anbode an d'n Prins en Jeugdprins(es), dur ut hoofd van de krantekommissie. Mar nou is ut zoë dat de Prins en ut hoofd van die kommissie dit jaor iën en de zellufde persoën ware.

Dus dit jaor moos en ander lid van de krantekommissie de honneurs waarneme.

Nao enne korte speech, woorin duudeluk wier dat Prinse eigeluk publiciteitsgeile persoëne zien, mooge de Prins en de Jeugdprinses same de vorkant van de krant onthulle, . . .

den hun ien en groëte liest wier angeboje.

Heej zaag dur wer schitterend uut. De uutreiking op dees manier was errug leuk, en gefit de neje krant net dat bitje extra aandacht den ie verdient. Dornao geenge we mit de krant neve de deur, en dur ware wer hiël veul minse die dur enne wôn koëpe.

Bezoek Geijsteren

S'aoves, nao de Krantverkoëp, zien wej nog nor Geijstere gegaon naar hun Aldewieverbal.

Dit aangezien wej op hun recepsie verhinderd waare. De KEIE-schieters bestonde namelijk 5x11 jaor. Wej hebbe genne spiet dat wej gegaon zien, want ut was dor klén, mar wel KEI gezellig.

Vorst Emiel haj op en antal Geijsterse sites gekeke . . . die ware vur ut lest bejgewerkt in 2010.

Dus toen Emiel dor ut woord noom zej hej tigge de Geijstere minse:

"hald mekaar vast minse, . . . dit gut KEI hard ankomme . . . ut is al 2013!"

Dit kwaam KEI hard an dor, mar gelukkig kregge zeej van os en paar honderd alde krante, zoëdat zej koose gaon leze wat ze allemol gemist han. Ok haaj prins Jop 150 KEI-harde gekokte eier mitgenome, dus dat vonde de Geijsterse minse wel KEI moj, zoë hân zej ieder 3 eier.

Nao enne KEI gezellige aovend ginge pas laat nor huus, alliën ware wej toen wel ozze Mark kwiet.

De Receptie

Dun dag nao os bezuuk an Geijsteren, zondag de 27^e, han wej os Prinsereceptie. Um ulluf over 2 begos ut traditiegetrouw mit en serenade van de muziekveriëning. Dornao kwaam ut lekker op gang. Ut was nie superdruk, maar ut bleef wel hiël lang, hiël gezellig.

Dat was mede te danke an de kei goeje joekskapel uut Leune; "**Krom dur dun bocht**".

Zeej brochte volume, stemming en mieke dur en echt fiëst van.

S'aoves ien dun Terp wier dur ôk nog en moj fiëstje gebouwd.

JVV-aovend

Woensdag 30 jannewarie was ut tied vur de JVV aovend. Nou wert dur al jaore gesanikt dur de JVV-ers . . . en dur ozze vurzitter . . . den zich ôk al bijna JVV-er mug noeme, . . . dat de raad zich te wendig mengt mit de aldere carnavalsvierders.

Vorst Emiel haj de oplossing bedocht. Hej liet an ut begin van dun aovend bej iedere toffel twië extra steul zette, en de raad mos dan verspreid dur de zaal an al die toffels gaon zitte en gezellig mitbuurte mit die alde. Nao en klen halluf uurke mosse de raodsleje dan wer en toffel durschuuve. Dit werkte wonderwel prima.

Sommige raodsleje ware vuuraf en bitje bang vur die alde, mar ut bleek reuze mit te valle;

ze beete nie, en dat gold ok vur diegene die hun tand nog ienhan.

Dur was neje muziek op d'n aovend, . . . iëne kel alliën, . . . en den viel goed ien de smaak.

Pierre van Helde kwam enne buut doen, wat hiël leuk was, . . . mar eigeluk ware Thei de Rijck en Karel Steeghs veul leuker. Dus ut ziet dur nao ut dat, ut stukske humor vort dur de JVV-ers zelluf werd iengevuld. Al mit al enne geslaagde aovend, mit alliën mar positieve reaksies, zellufs de raodsleje vonde ut achteraf zellufs leuk op dees manier.

SJMO - Scholcarnaval

Donderdag 7 fibruwarie bezochte wej de SJMO en daags dornao de Schôlcarnaval. Tijdens de scholoptocht wier dur spontaan vergete um ut jeugdtrio op te hale, mar dat was gelukkig nie os schuld. Gelukkig noom ut jeugdtrio toen zelluf ut inisiatief, en zien ze gauw zelluf angeslote, anders han ze dor nou nog gestaon.

Zieke bezuuk

Vrijdag aovend vur de carnaval gaon de Prins en Prinses altied same mit d'n Vorst op ziekebezuuk bej Oelderse minse die ien ut ziekenhuus ligge. Angezien dur genne Mök ien ut ziekenhuus laag, haaj prins Jop zien oma, vrouwke Raaymakers, gevraagd um net te doen of ze ziek was.

Zoë koos Jop moj punte score want hej was al verrekke lang nie bej zien oma op bezuuk gewist.

Zaoterdag

Klënste Mökske

Zaoterdag 9 fibruwarie; ging ut dan toch echt beginne. De méste raodsleje, inclusief de Prins, ware 's merges al um 7 uur ien de soos vur ut Carnavals-zaoterdag-SOOS-ontbijt. De jonges en megjes van de soos han wer gezurrugd vur gebakke eier mit spek, brudjes knak, koffie en nog veul mier.

De soos haaj koste nog moeite gespaard, ze han zelfs de Oelderse toppers geboekt um daar smerges en optrej weg te geve, um al vast ien de stemming te komme.

Terwiel de raad nog ien de Liende bezig was mit de vurbereidinge, ging de Prins, Prinses en Vorst um 11 vur 11 nor ut klenste Mökske. Den was dit jaor, net as 2 jaor geleje, gebore an de Gunhoek bej . . . Ruud en Irene van Diek. Ut was dor wer gezellig en Vorst Emiel kreeg ut toch wer klaor um ut Mökske dôr kapot af te levere.

Prinseinstallatie

Dornao mosse wej wer rap verder, want de prinseinstallatie ien Venroy begoos al um 12.44 uur. Tijdens de instalasie wiere wej toch wel efkes ontroerd, toen wej ien enne volle, muuskes-stille schouwburg, en groët compliment kreege van burgemester Hans Gillise, . . . hej sprook ovver hoe wej bej ut ovverlijde van Willem en Joanneke han gehandeld.

Wej ware dorien, volges um, en vurbeeld gewist vur wat en carnivalsverieniging nog mier kan, dan alliën mar fiestviere.

Verder was ut was enne middag mit veul humor. Vur ut urst wiere ôk de prinse uut de durpe op en nette manier angekondigd en kreege zej enne digitale sleutel van hun durrup uut hande van dun burgemester.

Nao afloëp kosse we nog gezellig en pilske drinke ien de fwajee, mar op de ien of ander manier lukte ut os mar nie um de munte op te krieger. An ut eind van de middag han we zat gehad, en han wej zellufs mier munte over as dat we gekrege han, . . . ra ra hoe kan dat?

Traditie getrouw zien wej nor Oeldere teruggereje toen de andere nor de roets ginge, want wej kieze nog steeds vur d'n Oelderse carnaval.

Heilige mis

Um zeuve uur begos dan toch de mis. De jeugdfanfaar was ok wer van de partej en zuurde vur de juuste carnivalssfeer. Uuteraard mooge de Prins, Prinses, Jeugdprinses, Jeugdvorst en Jeugdnar ok hun steentje bejdrage. Op ut eind van de mis kwam vorst Emiel an ut woord; Hej was alle negativiteit spuug zat en kwaam mit en nej motto vur dizze carnaval; **Blijf positief!** Ut was enne indrukwekkende speech wor veul, hoe kan ut ok anders, positieve reaksies op kwame. An ut eind kreeg pastoer ziene zoveulste jaormedaille uutgereikt.

Mökkebal

Dornao ginge we same mit de jeugdfanfaar nor d'n Terp wor en tas koffie of en gleske fris klorstond, mit en lekker stukske flai. Um nege uur ginge we nor de Liende, want ut wier langzaam tied vur ut mokkebal. Gelukkig ware wej nie de ennigste die dat van plan ware, want dur ware flink wat Mökke op af gekomme.

En terecht want dur zaat en keigoetje band; . . . **de Towerband**.

Bej de opening zong Jop zien "geluksliedje" op de melodie van "die Iesbere" en dat wier goed opgepikt dur de band. Jop haaj ut dus good vurelkaar, en dan hedde dus vriende.

Wej hebbe dur mit zien alle enne ongeluufeluk gezellige aovend van gemakt, letterluk iederiën duuj mit. De band en de Oelderse Mökke wisse mar nie van ophalde, mar enne kier mosse we dur toch mit stoppe.

Toen wiere dur tradisiegetrouw wer eier gebakke. Ien ut bakhok wier super-eierbakker Jop gemist. Mar toch smieke de eier wer goed.

Uut eindelijk geeng iederiën nao huus nao enne lange, mar geslaagde carnivalszaoterdag.

Zondag

Op de zondag zien wej um halluf 1, same mit de Mök is Los, en de jeugdraod naor d'n Zandhoek gegaon, um jeugdprinses Renske op te hale. Met Renske op de wage zien wej wer terug nor Oeldere gereje en hebbe dor prins Jop en prinses Rianne opgehald.

Nao en korte pauze zien wej metiën verder gegaon mit dun optocht. Den was dit jaor behuurluk lang, en dur zaate veul leuke en moj gemakte dingge ien. Nao zonne optocht is ut dan ôk nie verwonderluk dat ut snel druk wier ien de Liende. Dus kosse we dan ôk optied opene ien enne volle zaal.

Het jeugtrio ging wer speeche en ging vrolijk verder wor ze mit de proclamatie ware gebleve. Jeugdprinses Renske haj gedromd over dun brandwerwage van Geert Kerste den dinsdag de mok zuuj blusse waordur de Carnaval nog langer zuuj duure. **Blief droëme Renske.** De jeugd ging wer op de nek en ut fiëst was echt begonne. Dun DJ was "stom", mar gelukkig nie "doëf", dus hej lefde zich snel ien, ien de Limburgse Carnaval en ut wier enne kej gezellige middag.

Nao ut Kienderbal bezochte we de soos, wor de opening dur ut trio wier uutgesteld umdat prinses Renske tot ur groëte teleurstelling ziek nor huus was gegaon. Gelukkig ging ut fiëst vur de rest van de jeugd wel gewoën dur en was ut errug leuk ien de soos. S'aves ien dun terrup was ut nie echt druk, mar naodat prins Jop de zaak haj angezwengeld mit zien liedje, wier ut toch nog hiël gezellig.

Mondag

Mondag begosse we net as ieder jaor mit ut snotneuzebal. Nao alle berichte over en steeds klender werrrende schôl, ware we blej dat ut bal vur de allerklenste toch nog zo druk bezocht wier. Hoëgtepunt is traditiegetrouw ut valle van de balonne. Jeugdprinses Renske, . . . die gelukkig wer beter was, . . . moog ut touw uut ut net trekke.

Nao ut snotneuzebal rap nor Venroy vur dun optocht. Wej huurde van minse neve de kant dat wej . . . tot dan toe . . . de mojste Prinsewage han. Nao dun optocht geenge wej wer drek nor Oeldere, want dor is toch ut echte fiëst. Dur ware aardig wat Mökskes em Mökkinnekes nor de Mökkestal gekomme.

Um zes uur was ut tied vur de uitreiking van de prieze vur de **Cup-cake-wedstrijd**. Fantasties um te zien hoeveel kiender dur, al dan nie, same mit moeder enne cupcake han gebakke. En fantasties um te zien hoeveel werrruk dur was besteejd en hoe moj die dinge dur uuttaage. Dur waare twië professionele jurielade um dees cakeskes te beoerdiële; **Dr. Oetker en Herman den Bleiker.**

Zeej waare NIE positief en zaate de cakejes alliën mar af te zeike; . . . én goeide, tot groëte schrik van de kiender, enne hoëp cakejes ien d'n dreksbak.

Net op tied greep vorst Emiel ien, anders han zej alles weggegoëjd. Emiel stelde vur dat prins Jop en prinses Rianne ut zun beoerdiële en zej dun dat veul serieuzer. Ze han hier aardig wat tied vur neudig, mar de kiender hinge an hun lippe. Mar dur was veul werrruk an gedaon, dus dur mos ôk serieus beoerdiëld werre. Uuteindeluk wisse Jop en Rianne toch enne winnaar an te wieze, mar alle diëlnemers kregte zoëwiesoë enne pries.

Nao ut Kienderbal ginge we wer nor de soos, wor uut volledige jeugdtrio nou kos opene. Jeugdprinses Renske dromde nog steeds van Geert Kerste mit ziene brandwerwage. **Blief droëme Renske.** Ut was druk en gezellig ien de soos.

S'aves ien dun Terp ôk. Herman haaj zien sigarke nog diels vur d'n aovend bewaard. De jeugdcommissie haaj den dag slecht opgelet, want s'aves laat liep dur nog iën menneke van de jeugdraod, mit enne Sjukomel ien de hand, mit ien de polenaise. Ut was nog lang druk en gezellig ien dun Terp.

Dinsdag BBZ

Dinsdag, de latsten dag alwer. Wej begosse um halluf iën ien dun terrup mit dun brunch. Zoëas gebruuikeluk haaj Paula wer vur heerluk werrruk vleis en lekkere gehakte bollekes gezurrugd. Nao dat wej lekker gegete han en efkes rustig dun tied han um uut te buuke, vertrokke we nor de Liende vur de BBZ.

Um drie uur ging uut beginne en de de zaal was stampvol. Dur wier os wer en schitterend programma vureschotteld mit veul vaart en afwisseling . . . én veul verrassende artieste. Toen de optrejes gewist ware ging dun DJ dur mit ut dreje van goeje carnavalsmuziek, . . . al kos hej nog steeds nie praote.

Um zes uur mos de jeugd afsluute. Ut trio moog nog iëne kier spieche en jeugdprinses Renske dromde nog steeds van Geert mit ziene brandwerwage den de mök zuuj blusse.

Blief drome Renske.

Jeugdvorst Jesper haaj en nog enne flinke speech worin hej vertelde dat hej zien groëte vurbeeld vorst Emiel ovver 6 jaor op zuuj volge, as hej 18 zuuj werre. Emiel zuuj dan precies 11 jaor vorst zien.

Dornao kosse we en brudje hamburger ete of en brudje knak. Die latste ware ien de plats gekomme van de brudjes kank van vurrig jaor. Ut was super gezellig en de minse wisse nie van naor huus toe gaon. Um halluf 9 moos d'n DJ dan toch stoppe en kwaam dur toch echt en end an de Carnaval ien ozze groëte mökkestal.

Ien de soos was de jeugd toen ok al host an ur latste uurke bezig, en tigge tien uur was ut vur hun zo wiet; de mök mos ien de fik. Nao al ut speechgeweld van de jeugdprinses en de jeugdvorst, . . . al dan nie geholpe dur hun vaders, . . . zurgde Jeugdvar Jannes same mit zien vader vur **DE stunt van dizze carnaval**. Want toen Renske de Mök net ien brand haaj gestoke, kwaam dor toch enne brandwerwage an scheure, mit zwaailichte en sirene.

De minse die de droëm van Renske nie han mitgekregen schrokke zich enne aap en dochte dat ut hielemol fout ging. Mar de meste begrepe toch metiën dat Geert Kerste hier vur en fantastiese stunt haaj gezurruigd. Ik wiët zeker dat dur ien Oeldere veul minse op 112-melding.nl hebbe zitte kieke wor dur brand was. Helaas vur Renske was Geert wel wat an de laate kant en was den Mök nie mer te redde; de jeugdcarnaval zaat dur toch echt op.

De groëte mökke vierde toen nog en kei gezellig fiëst ien enne bomvolle Terp, mar ôk dor ging ut snel richting 12 uur, tied um af te sluute.

Vorst Emiel halde net vur 12 uur Jos en Annemarie nog efkes naor vuur um ze ien ut zunnene te zette. Jos . . . stuut namelijk geer ien de belangstelling. Jos den stopt nl. nao 4 jaor as bestuurslid van de vereniging. Annemarie kan dur echter gen genoeg van kriege en gut gewoen dur mit naeje, . . . en knuup anzetten aan jasse en giletjes.

Dornao moog Prins Jop nog iëne kier spieche, en iederiën bedanke, waaronder zien eige Prinses. Toen gingen we allemol nor buute um de groëte Mök ien de fik te steke en vur ut urst ien ongeveer 5 jaor lukte ut, um dat hielemol volges plan te doen. Naodat wej de prins en de prinses bedankt han vur dizze schônne carnaval ginge we binne nog efkes dur mit fieste. Ien ut begin ging ut dur ruig an toe, mar efkes latter toen dun DJ wer echte carnavalsmuziek ging dreje bleef ut nog lang gezellig. Nao nog en paar uurkes gruweluk naogefiëst te hebbe, zaat ut dur dan toch echt op, carnaval 2013 was wer goed geslaagd en errug gezellig gewist.

Ut Jaorverslag is opgesteld dur de seniorenexpres van de raad te wiëte

- Hans Loonen
- en John Voermans

Bedankt meense.